

दिनांक : 05.09.2026

समय : 18.45 बजे

आकाशवाणी जयपुर-अजमेर
प्रादेशिक समाचार

व राज्य रा केई हलकां मांय बिरखा-सवाईमाधोपुर, धौलपुर अर बारां समेत ऊगणी हलकां मांय कुछ हिस्सा तर-ब-तर।

व प्रदेश मांय मौसमी बीमारियां री रोकथाम रा बत्ता असर वाळा हलकां मांय सघन सर्वे करायो जावेला।

व राष्ट्रपति द्रौपदी मुर्मू कह्यो-बेहतर शिक्षा ऊं ई विकसित भारत रो लक्ष्य हासिल कर्यो जा सके है।

व श्रीकृष्ण जन्माष्टमी रा दूजा दिन आज पूरा प्रदेश मांय नंदोत्सव रो उमाव-कृष्ण मिन्दरां मांय बधाई गावण अर न्यारी-न्यारी ठौड़ां शोभायात्रावां रा कार्यक्रम।

000

राज्य मांय चौमासा री बिरखा रो सिलसिलो ओजू सुरू व्हे ग्यो है। आज केई हलकां मांय तेज हवा सागे बारिश व्ही। राजधनी जयपुर मांय आज आखा दिन मेह बरस्यो। कोटपूतली-बहरोड़ जिला रा पावटा मांय करीब पौन घंटा ताई झमाझम बिरखा व्ही। श्रीगंगानगर जिला रा भोमपुरा, 82 आरबी अर मुकलावा हलका मांय ई पाणी बरस्यो। बारां जिला रा घणखर हलकां मांय लारला दो दिन ऊं छांटो-छिड़को व्हे रह्यो है। म्हाणा खबरनवीस बतायो के केलवाड़ा हलका री भैंसासुर नदी मांय पाणी उफणबा ऊं केई गांवां रो संपर्क कट ग्यो है।

.....

डीग जिला रा केई हलकां मांय लारला दो-तीन दिन ऊं रुक-रुक र मेह बरस रह्यो है। लगातार बारिश ऊं साखां ने नुकसाण व्हेवण री शंका है। ई बीचे भरतपुर जिला मांय व्हे रही चोखी बिरखा ऊं बंधां मांय लगातार पाणी आ रह्यो है। बारेठा बंधा मांय पाणी पूगावण वाळा हलका मांय व्हे रही तेज बरसात ऊं बांध मांय पाणी रो लेवल ऊंचो आ रह्यो है। बंधा रा दो दूरुजा खोल र बत्तो पाणी निकाळ्यो जा रह्यो है। पुरा बाई खेड़ा, कोठी खेड़ा, नारौली अर कंजौली समेत केई ठौड़ां जनता ने सावचेत कर र लोगां ऊं हिफाजत वाळी ठौड़ां जावण री अरज करी ज्यी है। सवाईमाधोपुर जिला मांय ई व्हे रही लगातार बारिश ऊं नदी-नाळा उफणबा लाग्या है। खण्डार अर कुण्डेरा समेत केई ठौड़ां पाणी भर जावण ऊं आवण-जावण माथे असर पड़्यो है। लारला चौबीस घंटा मांय सवाईमाधोपुर अर धौलपुर मांय 10-10 सेंटीमीटर ऊं बत्तो पाणी बरस्यो। मौसम महकमा रे मुजब काल भरतपुर, जयपुर अर कोटा संभाग मांय कठे-कठे हल्की ऊं मझला दर्जा री बरसात व्हेवण रा आसार है, हालांकि एक-दो ठौड़ां तेज बिरखा री संभावना है।

000

प्रदेश मांय डेंगू, चिकनगुनिया, मलेरिया अर स्वाइन फ्लू समेत न्यारी-न्यारी मौसमी बीमारियां री रोकथाम सारू आं रा असर वाळा हलकां मांय सर्वे कराये जावेला। चिकित्सा अर स्वास्थ्य विभाग री प्रमुख शासन सचिव गायत्री राठौड़ रेपिड रेस्पॉस टीमं री कार्यवाही सागे ई मच्छर पनपबा ऊं रोकण रा काम माथे लगातार निगराणी राखण रा हुकम दीना है। श्रीमती राठौड़ आज जयपुर ऊं वीडियो कॉन्फ्रेंसिंग रे जरिए मीटिंग कर ई बारा मांय राज्य रा सगळा चिकित्सा संस्थानावां ने सावचेत रेहवण बाबत् कह्यो। प्रमुख शासन सचिव कह्यो के स्वाइन फ्लू अर दूजी मौसमी बीमारियां ऊं मांदा व्ह्या लोगां रा सम्पर्क मांय आवण वाळां रो ई एहतियातन ईलाज कर्यो जावणो चाहिजे।

000

मुख्य सचिव वी. श्रीनिवास जोधपुर मांय जिला री चिकित्सा अर स्वास्थ्य ऊं जुड़ी व्यवस्थावां रो जायजो लेवण सारू आज अहलकारां सागे मीटिंग कीनी। मुख्य सचिव मातृ अर शिशु स्वास्थ्य ऊं जुड़्या नवाचारां ने असरदार तरीका ऊं लागू करण माथे जोर दीनो। वे बत्ती जोखिम वाळी आस वाळी लुगाइयां री असरदार निगराणी राखण अर नुवा जन्म्या बच्चां सारू ईलाज री व्यवस्थावां मजबूत करण बाबत् ई कह्यो। वे उम्मेद अस्पताल मांय मरीजां री बत्ती तादाद ने ध्यान राखता थकां ईलाज रा काम माथे बेहतर निगराणी री जरूरत बतायी। मुख्य सचिव बिलाडा, भोपालगढ़, पीपाड़, ओसियां अर बालेसर रा सेटेलाइट अस्पतालां मांय ऑपरेशन ऊं जापा करावण री सेवा ई सरू करण रा हुकम दीना।

.....

000

प्रदेश मांय नगरीय निकाय चुनाव सारू उम्मीदवार वोट देवण वाळां ने लुभावण री कोशिश कर रह्या है। सियासी पाटियां ई आप-आप रा उम्मीदवारां रा प्रचार मांय पूरो जोर लगा रही है। नगर निकाय चुनाव प्रचार रा सिलसिला मांय मुख्यमंत्री भजनलाल शर्मा आज भीलवाड़ा अर उदयपुर मांय रोड़ शो कीनो।

प्रदेश भाजपा अध्यक्ष मदन राठौड़ पुष्कर मांय निकाय चुनाव री तैयारियां ऊं जुड़ी मीटिंग कीनी। दूजी कानी विधानसभा मांय विपक्ष रा नेता टीकाराम जूली कांग्रेस रा राष्ट्रीय महासचिव भंवर जितेन्द्र सागे आज अलवर मांय पार्टी रो घोषणा पत्र जारी कीनो। स्थानीय असर वाळी ठौड़ां दूजा उम्मीदवार अर निर्दलीय प्रत्याशी ई वोट देवण वाळा लुभावण री कोशिश कर रह्या है। 9 अर 11 सितम्बर ने व्हेवण वाळा स्थानीय निकाय चुनाव सारू 38 हजार 900 ऊं बत्ता उम्मीदवार चुनाव मैदान मांय है। आं मांय 25 हजार ऊं बत्ता पुरुष अर 13 हजार 800 ऊं बत्ती महिला उम्मीदवार शामिल है। जयपुर जिला मांय सब ऊं बत्ता जदके सलूम्बर जिला मांय सब ऊं कम उम्मीदवार है। ई बीचे 77 वार्डां मांय उम्मीदवार सगळां री एक राय ऊं चुण्णी ज्या है।

000

राष्ट्रपति द्रौपदी मुर्मू कह्यो है के गुणवत्ता वाळी भणार्ई-लिखाई रे जरिए ही विकसित भारत रो सपना सांचो कर्यो जा सके है। वे आज शिक्षक दिवस रै मौके नई दिल्ली मांय राख्खी ज्या राष्ट्रीय शिक्षक पुरस्कार जळसा मांय बोल रही ही। राष्ट्रपति कह्यो के शिक्षकां रो मान करण वाळो समाज ही सही मायनां मांय बरकत करे है। वे कह्यो के बेहतर भणार्ई-लिखाई, कौशल विकास अर उद्यमिता देश ने आगे ले जावण मांय खास काम करे है। श्रीमती मुर्मू कह्यो के ज्ञान री ताकत सागे भारत ने दुनिया री कौशल राजधानी बणावण माथे देश रो खास ध्यान है।

.....

जळसा मांय राष्ट्रपति बेहतरनीन काम करण वाळा अध्यापकां ने राष्ट्रीय शिक्षक पुरस्कार दे र नवाजा। नवाजी ज्या शिक्षकां मांय जयपुर कने चाकसू रा टूमली का बास री मिडिल स्कूल री डॉ. वर्तिका

गुलाटी अर झालावाड़ रा महात्मा गांधी राजकीय स्कूल रा डॉ. दिव्येन्दु सैन ई शामिल है। ई मौके शिक्षा मंत्री प्रहलाद जोशी कह्यो के मेहनत अर समर्पण ऊं काम कर र राष्ट्रीय पुरस्कार हासिल करण वाळा अ 82 अध्यापक, देश रा 1 करोड़ ऊं बत्ता शिक्षकां री नुमाइंदगी करे है।

.....

देश रा महान शिक्षाविद् अर भारत रत्न ऊं नवाजी ज्या पैली वाळा राष्ट्रपति डॉ. सर्वपल्ली राधाकृष्णन री जयंती हर साल शिक्षक दिवस रा तौर ऊं मनायो जावे है। वां रा एक संबोधन मांय डॉ. राधाकृष्णन कह्यो हो के शिक्षा आत्मा री रोशनी है, जिण ऊं पूरी कायनात रोशन व्हे है।

.....

000

स्वच्छता ही सेवा अभियान ऊं देशभर मांय साफ-सफाई रा प्रति लोगां मांय जागरुकता आई है। ई साल 17 सितम्बर ऊं ई अभियान रो नवों दौर सुरू व्हेला, जो 2 अक्टूबर तांई चालेला। केंद्रीय आवासन अर शहरी कार्य मंत्री मनोहर लाल आज ई अभियान री तैयारियां रा बारा मांय जल शक्ति मंत्री सी.आर. पाटिल अर दूजा आला अहलकारां सागे वर्चुअल तरीका ऊं मीटिंग कीनी। ई दौरान आवासन अर शहरी कार्य मंत्री जनता ऊं ई अभियान मांय भाग ले र **स्वच्छता ही सेवा** ने जनता रो आंदोलन बनावण री अरज कीनी।

000

धौलपुर ज़िला मांय मनिया थाना हलका रा फूलपुर गांव मांय आज एक कार रे पोखर मांय पड़ जावण ऊं इण मांय सवार चार जणां री मौत व्हे गयी। पुलिस रे मुजब हादसा रे कारण 11 जणां रे डूब जावण री शंका है। जिला कलेक्टर श्रीनिधि बी.टी. बतायो के हादसा री ठौड़ बचाव रो काम चाल रह्यो है। कलेक्टर बतायो के कार मांय सवार धौलपुर रा अ रेहवासी जहारवीर बाबा रा दर्शन सारु जा रह्या हा।

000

श्रीकृष्ण जन्माष्टमी रा दूजा दिन आज नन्दोत्सव मनायो जा रह्यो है। ई मौके भगवान कृष्ण रा न्यारा-न्यारा मिन्दरां मांय बधाइयां गायी जा रही है। ई मौके केई ठौड़ां भजन-कीर्तन सागे भंडारा लगाया जा रह्या है। राजधानी जयपुर समेत न्यारी-न्यारी ठौड़ां शोभा यात्रावां निकाली जा रही है। श्रीनाथद्वारा मांय वल्लभ संप्रदाय री प्रधान पीठ श्रीनाथ जी मिन्दर मांय ई नंद महोत्सव रीत मुजब मनायो जा रह्यो है। इण ऊं पहली आधी रात ने कान्हा रे आवण री बगत ढोल-नगाड़ां अर शहनाई री मंगल ध्वनि बीचे ठाकुर जी रो अभिषेक करी ज्यो। भरतपुर रा बांके बिहारी समेत न्यारा-न्यारा मिन्दरां मांय जातरूआं री लेणां निज़र आ रही है। चित्तौड़गढ़ ज़िला रा सांवलिया सेठ मिन्दर मांय ई मोटी तादाद मांय जातरू पूग रह्या है। वठे जन्माष्टमी रे मौके भगवान श्रीकृष्ण रा न्यारा-न्यारा रूपां रो दरसाव करण वाळो ड्रोन शो राख्यी ज्यो।

000

सुप्रीम कोर्ट रा मुख्य न्यायाधीश न्यायमूर्ति सूर्यकांत कानून, न्याय अर कानून री भणार्ई रा बारा मांय मासिक व्याख्यानमाला सुरू करण रो ऐलाण कीनो है। शिक्षक दिवस रे मौके करी ज्या ऐलाण रे मुजब ई रे मार्फत कानून, न्याय अर समाज ऊं जुड़्या मुद्दां माथे विचार कर्यो जावेला। **“हर माह एक महत्वपूर्ण विचार”** माथे आधारित ई व्याख्यानमाला रे ज़रिए न्यायाधीश, कानून रा जाणकार ,संगठन अर शिक्षाविद् एके सागे विचार करेला।

000